

摘藻堂四庫全書薈要

集部

欽定四庫全書薈要

集部

漢魏六朝百三家集卷九十四

五



詳校官候選知縣臣吳甸華

欽定四庫全書薈要卷一萬九千六百八十六集部

漢魏六朝百三家集卷九十四

明 張溥 輯

劉峻集

啟

送橘啟

南中橙甘青烏所食始霜之日採之風味照座劈之香
霧喫人皮薄而味珍脈不粘膚食不留滓甘踰萍實冷亞

冰壺可以熏神可以芼鮮可以漬蜜羶鄉之果寧有此耶

書

與宋玉山元思書

驅馬金張之館飛蓋許史之廬習匡鼎之說詩騁谷雲之雕篆賓徒波湧輿輪靡息當是時也樂可言哉然靜思夫君愀焉軫歎何則方鑿圓枘鉏鋸難從翔鳥游魚蹉跎不狎是以賈生懷琬琰而挫翮馮子握璵璠而鍛

羽天誕英逸獨擅民秀心貞筠箭德潤珪璋信人之水
鏡一性之鎔範而荆南雄曲高音鮮和河西名驥滅沒
誰賞故若先生者進有三難退有三樂竊觀先生未能
鴻翔鸞起騰霞躋漢將由囿空桑麻田無負郭倪眉翕
肩以斯故耳今賢弟賓從抗鱗奮翼或衣繡江塘或鳴
騶洛渚連騎方驅擊鐘乃食萼跗若是吾子復何憂哉
惟當纂兩仲之微迹襲二疎之風流生與漁父同嬉死
葬要離墓側金石可碎聲華無寂斯道坦坦先生幸其

勗與

與舉法師書

聞諸行李高談徽德逖聽風聲心飛魂竦無異蘄仙之
望石髓太陰之思龍燭蒼星昏昃涼雲送秋道勝則肥
固應顧攝衣裳虹蜺帷幕霄露餌黃菊之落藥酌清澗
之苾流旦候歸鴈晨鳧暮聽羈雌獨鶴神影影爾蓋象
蕭史之騎鳴鳳列子之御長風雖荆卿旁若無人孝然
堅卧冰雪沈沈隱隱何以尚之哉至於馳騫經囿翺翔

書圃極龍宮之妙典彈石室之鴻記道生伏其天真曼
倩謝其辨物若乃習是童子措志雕蟲藻思內流英華
外發歲蕤秋竹照曜春松爵頌息明珠之譽長門濫黃
金之賞盛矣美矣煥其麗乎昔旅浙河嘗觀組績不覺
紙熟筆焚魂魄斯盡自茲厥後兩絕珪璧意睠睠於菁
華腸迴迴於九逝夫日御停照不踰隙穴海若瀆湧莫
限隈嶠以玉抵鵲昔傳餘寶冀閱清徽用瘳眩疾然越
民非嚮冠之所齊國豈奏韶之地望與其進無貽責焉

答劉之遴借類苑書

九冬有隙三餘暇時多游書圃代樹萱蘇若夫采疊疊
於緗紈閱微言於殘竹盟飫膏液咀嚼英華不知地之
爲輿天之爲蓋靡測迴塘莫辨輿馬烏足以言乎是用
周流墳素詳觀圖謀搦管聯冊纂茲英竒蛩蛩之謀止
於善草周周之計利在銜翼故鳩集斯文蓋自綴其漏
耳豈冀藏山之名播於士大夫哉

追答劉沼書

劉侯既重有斯難值予有天倫之感竟未之致也尋而此君長逝化爲異物緒言餘論蘊而莫傳或有自其家得而示余者余悲其音微未沫而其人已亡青簡尚新而宿草將列泫然不知涕之無從也雖隙駟不留尺波電謝而秋菊春蘭英華靡絕故存其梗槩更酬其旨若使墨翟之言無爽宣室之談有徵冀東平之樹望咸陽而西靡蓋山之泉聞弦歌而赴節但懸劔空壠有恨如何

答郭峙書

聞君子舊矣但人非豕鹿轉加遲滯波駁雨滯動間山川故無由交羽觴薦雜佩睨浮雲以搔首臨清風而浩歌變燧迴星亦云勞止

稱族子訐歆書

劉訐字彥度兄歆字士光並履高操共卜築種山宋熙寺東澗有終焉之志族祖孝標與書稱之

訐超超越俗如半天朱霞歆矯矯出塵如雲中白鶴皆

儉歲之梁稷寒年之織績

序

相經序

夫命之與相猶聲之與響聲動乎幾響窮乎應雖壽夭
參差賢愚不一其間大較可得聞矣若乃生而神睿弱
而能言八彩光眉四瞳麗目斯實天姿之特達聖人之
符表洎乎日角月偃之奇龍棲虎踞之美地靜鎮於城
纏天闕運於掌策金槌玉枕磊落相望代犀起蓋隱麟

交映井宅既兼食匱已實抑亦帝王卿相之明効也及其深目長頸頹顏感鶻虵行鷲立猴喙鳥味筋不束體血不華色手無春夷之柔髮有寒蓬之悴或先吉而後凶或少長乎窮乏不其悲歟至如姬公凝負圖之容孔父眇棲遑之迹豐本知其有後黃中明其可貴其間或躍馬膳珍或飛而食肉或皂隸晚侯初形未正銅巖無以飽生玉饌終乎餓死因斯以觀何事非命

自序

峻字孝標平原人也生於秣陵縣暮月歸故鄉八歲遇

桑梓顛覆身充僕圉齊永明四年二月逃還京師後爲

崔豫州刑獄參軍梁天監中詔峻東掌石渠閣以病乞

骸骨隱東陽金華山余嘗自比馮敬通而有同之者三

異之者四何則敬通雄才冠世志剛金石余雖不及之

而節亮慷慨此一同也敬通值中興明君而終不試用

余逢命世英主亦擯斥當年此二同也敬通有忌妻至

於身操井臼余有悍室亦令家道軼軻此三同也敬通

當更始之世手握兵符躍馬食肉余自少迄長戚戚無
歡此一異也敬通有子仲文官成名立余禍同伯道永
無血胤此二異也敬通膂力剛強老而益壯余有犬馬
之疾溘死無時此三異也敬通雖芝殘蕙焚終填溝壑
而爲名賢所慕其風流郁烈芬芳久而彌盛余聲塵寂
寞世不吾知魂魄一去將同秋草此四異也所以力自
爲序遺之好事云

志

東陽金華山棲志

夫鳥居山上層巢木末魚潛淵下窟穴泥沙豈好異哉
蓋性自然也故有忽白壁而樂垂綸負玉鼎而要卿相
行藏紛糾顯晦踳駁無異火炎水流圓動方息斯則廟
堂之與江海蓬戶之與金閨並然其所然悅其所悅烏
足毛羽瘡痍在其間哉予生自原野善畏難狎心駭雲
臺朱屋望絕高蓋青組且霑濡霧露彌願閒逸每思濯
清瀨息椒丘寤寐永懷其來尚矣蚓專噬壤民欲天從

爰洎二毛得居巖穴所居東陽郡金華山東陽實會稽
西部是生竹箭山川秀麗臯澤塊鬱若其羣峯疊起則
接漢連霞喬林布濩則春青冬綠迴溪映流則十仞洞
底膚寸雲合必千里雨散信卓犖爽塏神居奧宅是以
帝鴻遊斯鑄鼎雨師寄此乘烟故澗勒赤松之名山貽
縉雲之號近代江治中奮迅泥滓王徵士高拔風塵龍
盤鳳棲咸萃茲地良由碧湍素石可致幽人者哉金華
山古馬鞍山也蘊靈藏聖列名仙謀左元放稱此山云

可免洪水五兵可合神丹九轉金華之首有紫巖山山
色紅紫因此爲稱靡迤坡陀下屬深渚巔岿嶷嶙上虧
日月登自山麓漸高漸峻龍路迫隘魚貫而升路側有
絕澗閘間虜豁俯窺木杪焦原石邑匪獨危懸至山將
半便有廣澤大川臯陸隱賑予之葺宇實在斯焉所居
三面皆迴山周繞有象郭郭前則平野蕭條目極通望
東西帶二澗四時飛流泉清瀾微霏滴瀝生響白波跳
沫涵涌成音並漕瀆通引交渠綺錯懸溜瀉於軒甍激

湍迴於階砌供帳無綆汲盥漱息瓶盆楓櫨椅櫪之樹
梓柏桂樟之木分形異色千族萬種結朱實包綠裹机
白蒂抽紫莖櫛蠹笨尊捎清風鳴籟垂條欄戶布葉房
櫳中谷澗濱華藥攢列至於青春緩謝萍生泉動則有
都梁含馥懷香送芬長樂負霜宜男泣露芙蓉紅華照
水臯蘇縹葉從風憑軒永眺蠲憂亡疾丘阿陵曲衆藥
灌叢地髓抗莖山筋抽節金鹽重於素璧玉豉貴於明
珠可以養性消痾還年駐色不藉崔文黃散勿用負局

紫丸翱翔羣鳳風胎雨殼綠翼紅毛素纓翠鬣肅肅毛
羽關關好音皆馴狎園池旅食雞鶩若乃鳩日伺辰響
類鐘鼓鳴蛭候曙聲像琴瑟元猿薄霧清嘒飛猿乘烟
咏吟嘈噴嘹亮悅心娛耳諒所以跨躡管籥韜軼笙簧
宅東起招提寺背巖面壑層軒引景邃宇臨崖博敞閒
虛納祥生白左瞻右睇仁智所居故碩德名僧振錫雲
萃調心七覺詆訶五塵郁列戒香浴滋定水至於熏鑪
夜藝法鼓旦聞予則跼蹶衣躬行頂禮詢道哲人欽

和至教每聞此河紛梗彼岸永寂熙熙然若登春臺而
出宇宙唯善是樂豈伊徒言寺東南有道觀亭亭崖側
下望雲雨蕙樓菌榭隱映林篁飛觀列軒玲瓏烟霧日
止却粒之岷歲集神仙之客餌星髓吸流霞將乃雲衣
霓裳乘龍馭鶴觀下有石井聳峙中測雕琢刻削頗類
人工躍流濺瀉湧決咽電擊雷吼駭目驚魂寺觀之
前皆植修竹檀欒蕭瑟被陵緣阜竹外則有良田區畛
通接山泉膏液鬱潤肥腴鄭白決漳莫之能擬致紅粟

流溢鳧鴈充厭春鱉白膳碧雞冬葷味珍霜鷄穀巾取
於丘嶺短褐出自中國寒將逼側於池湖管蒯駢填於
原隰養給之資生生所用無不阜實藩籬充牣崖巘歲
始年季農隙時間濁醪初齋醪清新熟則田家野老提
壺共至班荆林下陳罇置酌酒酣耳熱屢舞誼吹盛論
箱庾高談穀稼嗚噓謳歌舉盃相抗人生樂耳此歡豈
訾若夫蠶而衣耕而食日出而作日入而息晚食當肉
無事爲貴不求於世不忤於物莫辨榮辱匪知毀譽浩

蕩天地之間心無怵惕之警豈與稽生齒劍楊子墜閣較其優劣者哉

論

辯命論有序

主上嘗與諸名賢言及管輅歎其有奇才而位不達時有在赤墀之下預聞斯議歸以告余余謂士之窮通無非命也故謹述天旨因言其畧云爾

臣觀管輅天才英偉珪璋特秀實海內之髦傑豈日者

卜祝之流乎而官止少府丞年終四十八天之報施何其寡歟然則高才而無貴仕饔飧而居大位自古所歎焉獨公明而已哉故性命之道窮通之數天闕紛綸莫知其辯仲任蔽其源子長闡其惑至於鶡冠甕牖必以懸天有期鼎貴高門則曰唯人所召饒讒讒咋異端斯起蕭遠論其本而不暢其流子玄語其流而未詳其本嘗試言之曰夫道生萬物則謂之道生而無主謂之自然自然者物見其然不知所以然同焉皆得不知所以

得鼓動陶鑄而不爲功庶類混成而非其力生之無亭
毒之心死之豈虔劉之志墜之淵泉非其怒昇之霄漢
非其悅蕩乎大乎萬寶以之化確乎純乎一化而不易
化而不易則謂之命命也者自天之命也定於冥兆終
然不變鬼神莫能預聖哲不能謀觸山之力無以抗倒
日之誠弗能感短則不可緩之於寸陰長則不可急之
於箭漏至德未能踰上智所不免是以當放勳之世浩
浩襄陵天乙之時焦金流石文公燹其尾宣尼絕其糧

顏回敗其叢蘭冉耕歌其采芣夷叔斃淑媛之言子輿
困臧倉之訴聖賢且猶若此而況庸庸者乎至乃伍員
浮屍於江流三閭沉骸於湘渚賈大夫沮志於長沙馮
都尉皓髮於郎署君山鴻漸鍛羽儀於高雲敬通鳳起
推迅翮於風穴此豈才不足而行有遺哉近世有沛國
劉瓛瓛弟璉並一時秀士也瓛則關西孔子通涉六經
循循善誘服膺儒行璉則志烈秋霜心貞崑玉亭亭高
竦不雜風塵皆毓德於衡門並馳聲於天地而官有微

於侍郎位不登於執戟相次殂落宗祀無饗因斯兩賢
以言古則昔之玉質金相英髦秀達皆擯斥於當年韞
竒才而莫用候草木以共彫與麋鹿而同死膏塗平原
骨填川谷堙滅而無聞者豈可勝道哉此則宰衡之與
皂隸容彭之與殤子猗頓之與黔婁陽文之與敦洽咸
得之於自然不假道於才智故曰死生有命富貴在天
其斯之謂矣然命體周流變化非一或先號後笑或始
吉終凶或不召自來或因人以濟交錯糾紛迴環倚伏

非可以一理徵非可以一途驗而其道密微寂寥忽恍
無形可以見無聲可以聞必御物以效靈亦憑人而成
象譬天王之冕旒任百官以司職而或者覩湯武之龍
躍謂戡亂在神功聞孔墨之挺生謂英睿擅竒響視韓
彭之豹變謂鷲猛致人爵見張桓之朱紱謂明經拾青
紫豈知有力者運之而趨乎故言而非命有六蔽焉余
請陳其梗槩夫靡顏膩理哆嚙頰頰形之異也朝秀晨
終龜鵠千歲年之殊也聞言如響智昏菽麥神之辯也

固知三者定乎造化榮辱之境獨曰由人是知二五而
未識於十其蔽一也龍犀日角帝王之表河目龜文公
侯之相撫鏡知其將刑壓紐顯其膺錄星虹樞電昭聖
德之符夜哭聚雲鬱興王之瑞皆兆發於前期渙汗於
後葉若謂驅貔虎奮尺劔入紫微升帝道則未達宵冥
之情未測神明之數其蔽二也空桑之里變成洪川歷
陽之都化爲魚鱉楚師屠漢卒睢河鯁其流秦人坑趙
士沸聲若雷震火炎崑岳礫石與琬琰俱焚嚴霜夜零

蕭艾與芝蘭共盡雖游夏之英才伊顏之殆庶焉能抗
之哉其蔽三也或曰明月之珠不能無類夏后之璜不
能無考故亭伯死於縣長相如卒於園令才非不傑主
非不明也而碎結綠之鴻輝殘懸黎之夜色抑尺之量
有短哉若然者主父偃公孫弘對策不升第歷說而不
入牧豕淄原見棄州部設令忽如過隙溘死霜露其爲
詬恥豈崔馬之流乎及至開東閣列五鼎電照風行聲
馳海外寧前愚而後智先非而終是將榮悴有定數天

命有至極而謬生妍蚩其蔽四也夫虎嘯風馳龍興雲屬故重華立而元凱升辛受生而飛廉進然則天下善人少惡人多闇主衆明君寡而薰蕕不同器梟鸞不接翼是使渾敦禱杙踵武於雲臺之上仲容廷堅耕耘於巖石之下橫謂廢興在我無繫於天其蔽五也彼戎狄者人面獸心宴安鴆毒以誅殺爲道德以蒸報爲仁義雖大風立於青丘鑿齒奮於華野比于狼戾曾何足喻自金行不競天地版蕩左帶涕脣乘間電發遂覆瀍洛

傾五都居先王之桑梓竊名號於中縣與三皇競其萌
黎五帝角其區宇種落繁熾充牣神州嗚呼福善禍淫
徒虛言耳豈非否泰相傾盈縮遞運而汨之以人其蔽
六也然所謂命者死生焉貴賤焉貧富焉治亂焉禍福
焉此十者天之所賦也愚智善惡此四者人之所行也
夫神非舜禹心異朱均才絳中庸在於所習是以素絲
無恒玄黃代起鮑魚芳蘭入而自變故季路學於仲尼
厲風霜之節楚穆謀於潘崇成悖逆之禍而商臣之惡

盛業光於後嗣仲由之善不能息其結纓斯則邪正由
於人吉凶在乎命也或以鬼神害盈皇天輔德故宋公
一言法星三徙殷帝自翦千里來雲若使善惡無徵未
洽斯義且于公高門以待封嚴母掃墓以望喪此君子
所以自彊不息也如使仁而無報奚爲修善立名乎斯
徑廷之辭也夫聖人之言顯而晦微而婉幽遠而難聞
河漢而不測或立教以進庸怠或言命以窮性靈積善
餘慶立教也鳳鳥不至言命也今以其片言辨其要趣

何異乎夕死之類而論春秋之變哉且荆昭德音丹雲
不卷周宣祈雨珪璧斯罄于叟種德不逮勛華之高延
年殘獷未甚東陵之酷爲善一爲惡均而禍福異其流
廢興殊其迹蕩蕩上帝豈如是乎詩云風雨如晦雞鳴
不已故善人爲善焉有息哉夫食稻粱進芻豢衣狐貉
襲冰紈觀窈眇之竒儻聽雲和之琴瑟此生人之所急
非有求而爲也修道德習仁義敦孝悌立忠貞漸禮樂
之腴潤蹈先王之盛則此君子之所急非有求而爲也

然則君子居正體道樂天知命明其無可奈何識其不由智力逝而不召來而不距生而不喜死而不感瑤臺夏屋不能悅其神土室編蓬未足憂其慮不充誣於富貴不遑遑於所欲豈有史公董相不遇之文乎

廣絕交論

客問主人曰朱公叔絕交論爲是乎爲非乎主人曰客奚此之問客曰夫草蟲鳴則阜螽躍雕虎嘯而清風起故絪縕相感霧涌雲蒸嚶鳴相召星流電激是以王陽

登則貢公喜罕生逝而國子悲且心同琴瑟言鬱郁於
蘭芷道協膠漆志婉孌於墳簞聖賢以此鏤金版而鐫
盤盂書玉牒而刻鐘鼎若乃匠人輟成風之妙巧伯子
息流波之雅引范張款款於下泉尹班陶陶於永夕絡
繹縱橫烟霏雨散巧厯所不知心計莫能測而朱益州
汨彞敘越謨訓捶直切絕交遊比黔首以鷹鷂媿人靈
於豺虎蒙有猜焉請辨其惑主人听然而笑曰客所謂
撫絃徽音未達燥濕變響張羅沮澤不覩鴻鴈雲飛蓋

聖人握金鏡闡風烈龍驤夔屈從道汗隆日月聯璧贊
亶亶之弘致雲飛電薄顯棣華之微旨若五音之變化
濟九成之妙曲此朱生得玄珠於赤水謨神睿而爲言
至夫組織仁義琢磨道德歡其愉樂恤其陵夷寄通靈
臺之下遺跡江湖之上風雨急而不輟其音霜雪零而
不渝其色斯賢達之素交歷萬古而一遇逮叔世民訛
徂詐飈起谿谷不能踰其險鬼神無以究其變競毛羽
之輕趨錐刀之末於是素交盡利交興天下蚩蚩鳥驚

雷駭然利交同源派流則異較言其略有五術焉若其
寵鈞董石權壓梁竇雕刻百工鑪錘萬物吐漱興雲雨
呼噏下霜露九域聳其風塵四海疊其燠灼靡不望影
星奔藉響川鶩雞人始唱鶴蓋成陰高門旦開流水接
軫皆願摩頂至踵隳膽抽腸約同要離焚妻子誓徇荆
卿湛七族是曰勢交其流一也富埒陶白貲巨程羅山
擅銅陵家藏金穴出平原而聯騎居里閤而鳴鐘則有
窮巷之賓繩樞之子冀宵燭之末光邀潤屋之微澤魚

貫鳧躍颺沓鱗萃分鴈鶩之稻梁霑玉笋之餘瀝銜恩
遇進款誠援青松以示心指白水而旌信是曰賄交其
流二也陸大夫燕喜西都郭有道人倫東國公卿貴其
籍甚搢紳羨其登僊加以頷頤蹠頰涕唾流沫騁黃馬
之劇談縱碧雞之雄辯敘溫燠則寒谷成暄論嚴苦則
春叢零葉飛沈出其顧指榮辱定其一言於是有弱冠
王孫綺紉公子道不挂於通人聲未適於雲閣攀其鱗
翼丐其餘論附騏驥之旄端軼歸鴻於碣石是曰談交

其流三也陽舒陰慘生民大情憂合歡離品物恒性故
魚以泉涸而煦沫鳥因將死而哀鳴同病相憐綴河上
之悲曲恐懼寘懷昭谷風之盛典斯則斷金由於湫隘
刎頸起於苦蓋是以伍員濯漑於宰嚭張王撫翼於陳
相是曰窮交其流四也馳騫之倫澆薄之俗無不操權
衡秉纖纊衡所以揣其輕重纊所以屬其鼻息若衡不
能舉纊不能飛雖顏冉龍翰鳳雛曾史蘭薰雪白舒向
金玉淵海卿雲黻黼河漢視若游塵遇同土梗莫肯費

其半菽罕有落其一毛若衡重錙銖續微影撇雖共工之蒐慝驩兜之掩義南荆之跋扈東陵之巨猾皆爲匍匐逶迤折枝舐痔金膏翠羽將其意脂韋便辟導其誠故輸蓋所遊必非夷惠之室苞苴所入實行張霍之家謀而後動毫芒寡忒是曰量交其流五也凡斯五交義同賈鬻桓譚譬之於闐闔林回諭之於甘醴夫寒暑遞進盛衰相襲或前榮而後悴或始富而終窮或初存而末亡或古約而今泰循環翻覆迅若波瀾此則徇利之

情未嘗異變化之道不得一由是觀之張陳所以凶終
蕭朱所以隙末斷焉可知矣而翟公方規規然勒門以
箴客何所見之晚乎因此五交是生三釁敗德殄義禽
獸相若一釁也難固易携讎訟所聚二釁也名陷饕餮
貞介所羞三釁也古人知三釁之爲梗懼五交之速尤
故王丹威子以櫓楚朱穆昌言而示絕有旨哉近世有
樂安任昉海內髦傑早綰銀黃夙昭民譽適文麗藻方
駕曹王英特俊邁聯橫許郭類田文之愛客同鄭莊之

好賢見一善則盱衡扼腕遇一才則揚眉抵掌雌黃出其屑吻朱紫由其月旦於是冠蓋輻輳衣裳雲合輜輶擊鞞坐客恒滿蹈其閭閻若升闕里之堂入其奧隅謂登龍門之阪至於顧盼增其倍價翦拂使其長鳴影組雲臺者摩肩趨走丹墀者疊跡莫不締恩狎結綢繆想莊惠之清塵度羊左之微烈及瞑目東粵歸骸洛浦總帳猶懸門罕漬酒之彥墳未宿草野絕慟輪之賓藐爾諸孤朝不謀夕流離大海之南寄命瘴癘之地自昔把

臂之英金蘭之友曾無羊舌下泣之仁寧慕邱成分宅
之德嗚呼世路嶮巖一至於此太行孟門豈曰斬絕是
以耿介之士疾其若斯裂裳裹足棄之長蘧獨立高山
之頂歡與麋鹿同羣皦皦然絕其雰濁誠恥之也誠畏
之也

詩

登郁洲山望海

滄溟聯霄岫層嶺鬱嶢峴下盤鹽海底上轉靈鳥翼溟

溈非可辨鴻溶信難測輕塵久弭飛驚浪終不息雲錦
曜石嶼羅綾文水色

自江州還入石頭詩

藝文作劉峻英華次元帝後而逸其名或以爲元帝

詩非也

鼓枻浮大川延睇洛城觀洛城何鬱鬱香與雲霄半前
望蒼龍門斜瞻白鶴館槐垂御溝道柳綴金堤岸迅馬
晨風趨輕輿流水散高歌一作唱梁塵下絙瑟荆禽亂我
思江海遊曾無朝市玩忽寄靈臺宿空軫及關歎仲子

入南楚伯鸞出東漢何能栖樹枝
取斃王孫彈

始營山居

自惜厭諠囂執志好栖息
嘯歌棄城市歸來事畊織
鑿戶闕嶠嶢開軒望嶰峒
激水簷前溜脩竹堂陰植香風
鳴紫鷲高梧巢綠翼
泉脈洞杳杳流一作沉波下不極髣

髣玉山隈想像瑤池側
夜誦神仙記旦吸雲霞色
將馭六龍輿行從三鳥食
誰與金門士撫心論骨髓

出塞

薊門秋氣清飛將出長城絕漠衝風急交河夜月明
陷敵縱金鼓催鋒揚旆旌去去無終極日暮動邊聲

漢魏六朝百三家集卷九十四

欽定四庫全書薈要卷一萬九千六百八十七

集部

漢魏六朝百三家集卷九十五

明 張溥 輯

王筠集

賦

蜀葵花賦

惟茲竒草遷花西道凌金坂之威夷跨玉津之浩浩值
油雲之廣臨屬光風之長掃仰椒屋而敷榮值蘭房而

舒藻邁衆芳而秀出冠雜卉而當闡既扶疎而雲蔓亦
灼爍而星微布濩交加翁茸紛葩疏莖密葉翠萼丹華
表

為第六叔讓重除吏部尚書表

臣聞剗犀截鴈必俟昆吾之鋒逐日追風信資伯樂之
駿未有駟駕蹇足而方騁遙塗採藝鉛刀而求其斷割
伏惟則哲為體事艱歷代明別攸寄義重前王必使玉
石薰蕕區別靡雜涇渭玄黃條流不爽自非伯豪之天

下能稱仲子之時人歸德孝先之拔真抑僞巨源之黜
惡舉善然後可以銓鏡流品平均衡石

爲從兄讓侍中表

至如元勳舊儒之胄積德累仁之基九世七葉之華相
韓事漢之資不然則子駿之學洞古今平子之思侔造
化仲宣之辯識無滯次重之解經不窮然後可以喻旨
公卿問對帷宸陪六尺之輿通四方之意求之微臣此
塗頓隔

為王儀同瑩初讓表

執玉獻金卒先五等親冕迎軺光導百辟坐階遠大遂
致隆滿自位昇朝首職冠禮闈辭滿之願將際致仕之
請方奏而思渥恩皆昭獎必被寵章爰降朝禁驚矚是
以安石歸禾固請元規終以致讓況臣才質空疎器量
庸淺而可以妄參鉉席醜貌槐庭

上太極殿表

四海為家義存威重萬國來朝事惟壯觀憲北辰之居

所正南面之尊貴繡栢鏤檻延曜光輝虬柱虹梁杳冥
雲霧非許鄴之敢倫豈雍豫之能擬且工徒樂業庶民
日競一勞永逸不日而成信可以宴饗百神朝覲羣后
者矣臣過荷寵勞祿秩優潤謹率丹款上夫一千不足
微申鳧躍伏深慙悚

牋

答湘東王示忠臣傳牋

竊以孝實天經忠爲令德百行攸先一心靡忒昔淮南

鴻烈事無的准沛王通論義止儒術東平獲譽良爲片
言臨淄見稱文辭小道孰若理冠君親義兼臣子謹當
宣示遐邇光揚德音

書

與諸兒論家世集書

史傳稱安平崔氏及汝南應氏並累世有文才所以范
蔚宗世擅雕龍然不過父子兩三世耳非有七葉之中
名德重光爵位相繼人人有集如吾門世者也沈少傅

約語人云吾少好百家之言身爲四代之史自開闢已
來未有爵位蟬聯文才相繼如王氏之盛者也汝等仰
觀堂構思各努力

與長沙王別書

筠頓首頓首高秋淒爽體中何如願比勝納承入東禮
拜用深傾仰昔藩后遨遊不無是事或龍舟水嬉或臨
川送遠縱金飛旆汎此安流猶復見重良書以爲盛德
未有選日簡辰歸誠繫念尋法城之遊逗祇園之聚翹

心讚歎無以譬說僕夙疾增瘵蹇廢蓬門不獲執離彌
深傾懃願敬勗白書不次王筠頓首頓首

與東陽盛法師書

菩薩戒弟子王筠瀟名慧炬稽首和南問訊東陽盛法
師弟子昔因多幸早蒙覲接歲月推流踰三十載欽慕
風德獨盈懷抱間以山川無由禮敬司馬參軍仰述存
眷曲垂訪憶既荷錄舊之情兼佩慇懃之旨歡欣頂戴
難爲譬說仰承垂和履福享年九十有四嗟絳人之未

高同殷宗之遐壽且耳長直已過頂齒剛會不先落延
華駐彩怡神輔性自非宿殖善因何以招斯勝果尊年
尚齒之誠懷德敦舊之款依風慕道之深欣羨景仰之
至興居在念寤寐載懷弟子恨此樊籠迫茲纓鎖無由
問道撫躬如失庶心期冥會咫尺江山道術相忘棄置
形迹惟願敬勗保此期願赤松朱髮復何足貴飛錫騰
軀真在旦夕指陳丹款殊未伸暢儻惠一言豈不幸甚
弟子筠稽首和南

與雲僧正書

弟子孤子筠頓首稽首和南弟子繫結幽明備嬰荼蓼
攀援崩踴肌髓糜潰尋繹煩冤肝腸寸斷號天叩地永
隔精誠捨命捐軀終無補益思欲仰福廣爲灑事以伸
罔極之痛少寄追慕之誠鑄像度僧仰遵法教建齋設
會務依經典敷說大乘誘度羣生其福不淺仰惟大正
法師道心純淑至德凝深智包空有照通真俗多聞不
窮機辯無礙一代師匠四海推崇弟子宿值善因早蒙

親眷情同骨肉義等金蘭外書所謂冥契神交內典則
爲善友知識敬藉微緣敢陳大願來歲夏中欲仰請講
說弘法之情既無彼此眷愛之深特希降屈公私道俗
要請既多故預認聞必願允遂豈圖一旦忽有斯白臨
紙崩劬厝言無次弟子孤子王筠頓首頓首稽首和南

答釋法雲書

筠和南辱告垂示上答臣下審神滅論竊聞儼然有見
禮典之格言今則不滅法教之弘旨但妙相虛玄神功

凝靜自非體道者豈能默領其宗不有知機者無由冥
應其會聖主迹同萬機心游七淨哀愍羣生嫗煦庶物
滌彼蓋纏勛以解慧祛其蒙惑躋之仁壽信大哉爲君
善於智度者也弟子世奉法言家傳道訓而學淺行疎
封累猶軫既得餐稟聖教預聞弘誘一音得解萬善可
偕抃躍之情無以譬說弟子王筠和南

與瑗律師書

筠和南至節過念哀慕深至情不可任寒凝道體何如

想比清豫弟子羸勞每惡懣弊何理眷請勤御比日來
敘遣白王筠和南

序

自序

余少好書老而彌篤雖遇見暫觀皆即疏記後重省覽
懽興彌深習與性成不覺筆倦自年十三四齊建武二
年乙亥至梁大同六年四十載矣幼年讀五經皆七八
十遍愛左氏春秋吟諷常爲口實廣略去取凡三過五

抄餘經及諸官儀禮國語爾雅山海經本草並再抄子
史諸集皆一遍未嘗倩人假手並躬自抄錄大小百餘
卷不足傳之好事蓋以備遺忘而已

記

雲陽記

車箱阪下有黎園一頃樹數百株青翠繁密望如車蓋

碑

開善寺碑

妙門闕鍵開之者既難法海波瀾游之者未易是以軒
稱俊聖堯曰欽明韶濩有美善之風文武致時雍之業
地平天成惟事即世移風易俗匪止今身至如訪道峒
山乘風獨遠凝神汾水窅然自喪或宗仰黃老之談景
慕神僊之術斯蓋不度羣生事局諸已篤而爲論道有
未弘熏風璫露散馥流甘璧月珠星聯華颺葉修旛繞
於雲根和鈴響於天外玉池動而揚文寶樹搖而成樂

銘曰

亭亭切漢耿介凌烟層霓霞聳飛棟星懸

國師草堂寺智者約法師碑

結宇山椒疏壤幽岫蓄雲泄雨靄映房櫳浴日涵星翻
光池沼震居暇豫留思幽微研精經藏探求法寶香城
實相之談金河常樂之說究竟微妙洞達幽玄掖庭爲
道心之宮華林構重雲之殿師子之座高廣於燈王聽
法之筵衆多於方丈開寶函之奧典闡金字之微言顯
證一乘宣揚三慧辯才無闕遊戲神通莫不皆悟無生

咸知忘想隨類得解俱會真如銘曰

形在江湖心超祗鷺思協風雲量包宇宙軒瞰蒼波窓
承翠嶺須枕烟露擊持光景

哀策文

昭明太子哀策文

蜃輅俄軒龍驂跼步羽翽前驅雲旂北徼皇帝哀繼明
之寢耀痛嗣德之殂芳御武帳而悽慟臨甲觀而增傷
式稽令典載揚鴻烈詔撰德於旌旒永傳徽於舞綴其

辭曰

式載明兩實惟少陽既稱上嗣且曰元良儀天比峻儼
景騰光奉祀延福守器傳芳睿哲膺期旦暮斯在外弘
莊肅內含和愷識洞機深量包瀛海立德不器至功弗
宰寬綽居心溫恭成性循時孝友率由嚴敬咸有種德
惠和齊聖三善遞宣萬國同慶軒緯掩精陰義弛位纏
哀在疚殷夏銜恤孺泣無時蔬餼不溢禫導踰月哀號
未畢實惟監撫亦嗣郊禋問安肅肅視膳恂恂金華玉

璪元駟斑輪隆家幹國主祭安民光奉成務萬機是理
矜慎庶獄勤恤闕市誠存隱惻容無愠喜殷勤博施綢

繆恩紀爰初敬業離經斷句莫爵崇師卑躬待傳寧資
導習匪勞審諭博約是司時敏斯務辯究空微思探幾
蹟馳神圖緯研精文畫沈吟典禮優遊方冊饜飫膏腴
含咀肴核括囊流略包舉藝文遍該絀素殫極丘墳騰
帙充積儒墨區分瞻河闡訓望魯揚芬吟咏性靈豈惟
薄伎屬辭婉約緣情綺靡字無點竄筆不停紙壯思泉

流清漳雲委總覽時才網羅英茂學窮優洽辭歸繁富
或擅談叢或稱文囿四友推德七子慙秀望苑招賢華
池愛客託乘同舟連輿接席搞文揆藻飛觴汎醪恩隆
置醴賞逾賜璧徽風遐被盛業日新仁器非重德輶易
遵澤流兆庶福降百神四方慕義天下歸仁雲物告徵
稔沴褰象星霾恒耀山頽朽壤靈儀上賓德音長往具
僚無蔭詔承安仰嗚呼哀哉皇情卓愍切心纏痛脣嗣
長號跼萼增慟慕結親遊悲動氓衆憂若殄邦懼同折

棟鳴呼哀哉首夏司開麥秋紀節容衛徒警菁華委絕
書幌空張談筵罷設虛饋餼餼孤燈翳翳嗚呼哀哉簡
辰請日筮合龜貞幽埏夙啟玄宮獻成武校齊列文物
增明昔遊漳滏賓從無聲今歸郊郭徒御相驚嗚呼哀
哉背絳闕以遠徂轡青門而徐轉指馳道而拒前望國
都而不踐陵脩阪之威夷溯平原之悠緬驥蹠足以酸
嘶挽淒鏘而流泣嗚呼哀哉混哀音於簫籟變愁容於
天日雖夏木之森陰返寒林之蕭瑟既將反而復疑如

有求而遂失謂天地其無心遽永潛於容質嗚呼哀哉
即玄宮之冥漠安神寢之清閔傳聲華於懋典觀德業
於徽謚懸忠貞於日月播鴻名於天地惟小臣之紀言
實含毫而無媿嗚呼哀哉

樂府

有所思

丹墀生細草紫殿納輕陰曖曖巫山遠悠悠湘水深徒
歌鹿盧劒空貽玳瑁簪望君終不見屑淚且長吟

一作吟

陌上桑

人傳陌上桑未曉已含光
重重相蔭映軟弱

一作軟軟

自芬

芳秋胡始倚馬羅敷未滿筐
春蠶朝已老安得久彷徨

俠客篇

俠客趨名利劍氣坐相矜
黃金塗鞘尾白玉飾鈎膺
晨馳逸廣陌日暮返平陵
舉鞭向趙李與君方代興

三婦豔

大婦留芳褥中婦對華燭
小婦獨無事當軒理清曲
丈

人且安卧豔歌方斷續

雜曲二首

烏還夜已逼蟲飛曉尚賒
桂月徒留影蘭燈空結花
可憐洛城東芳樹搖春風
丹霞映白日細雨帶輕虹

行路難

千門皆閉夜何央百憂俱集斷人腸
探揣箱中取刀尺拂拭機上斷流黃
情人逐情雖可恨復畏邊遠乏衣裳
已縲一蠶催衣縷復擣百和薰衣香
猶憶去時腰大小

不知今日身短長
襖襠雙心共一袼
袖復兩邊作八襖
襟帶雖安不忍縫
開孔裁穿猶未達
胸前却月兩相連
本照君心不照天
願君分明得此意
勿復流蕩不如先
含悲含怨判不死
封情忍思待明年

楚妃吟

花早飛林中明鳥早歸
庭前日暖春閨香氣亦霏霏
香氣漂當軒清唱調獨顧
暮含怨復含嬌蝶飛蘭復裊
裊輕風入裙春可遊
歌聲梁上浮春遊方有樂
沈沈下羅

幕

詩

侍宴餞臨川王北伐應詔

金版韜英玉牒蘊精帝德乃武王威有征軒習弧矢夏
陳干戚周騫戎車漢馳羽檄我皇俊聖千年踵武德洞

十一一作千門威加八柱金正圯德水行失道胡馬南牧戎

徒西保薦食伊瀍整居豐鎬金關一作閣揚塵銅臺茂草

命彼膳夫爰詔協律樂賦出車絃操吉日玉饌駢羅瓊

漿泛溢聖德温温賓儀秩秩

早出巡行矚望山海

王生臨廣隰潘子望洪河同軫懷歸思俱興年逝歌曰
余異二子承睫淚滂沱剖符瀛海外結綬層山阿因心
留惻憫怒已息煩苛繕築循時隙興動藉民和高門惟
壯麗修雉亦駢羅層樓亦攀陟複道亦經過昧旦清音
上風氣入織蘿雲起垂天翼水動連山波奔濤延瀾汙
積翠遠峩峩鄉關屢迴曲還顧杳蹉跎曾微肅肅羽望

路空如何

北寺寅上人房望岫翫前池

安期逐長往交甫稱高讓
遠跡入滄溟輕舉馳昆閬
良田心獨善兼且情由放
豈若尋幽棲即目窮清曠
激水周堂下屯雲塞檐向
閑牖聽奔濤開窓延疊嶂
前階復虛沿瀾迤成洲漲
雨點散圓文風生起斜浪
游鱗互瀆灑羣飛皆哢吭
蓮葉蔓田田菱花動搖漾
浮光曜庭廡流芳襲帷帳
匡坐足忘懷詎思江海上

和衛尉新渝侯巡城口號

閶闔曖已昏，鈞陳杳將暮。樓烏城上返，一作晚雀林中

度。屯衛時巡警，凝威肆安步。閣道趨文昌，禁兵連武庫。
銅烏迎早風，金掌承朝露。采芻分曉色，睥睨生秋霧。維
城任寄隆，空想靈均賦。伊余方病免，丘園保恬素。

寓直中庶坊贈蕭洗馬

龍樓實九重，薄寒殊復早。玉堦泣清露，銅池結秋潦。霜
被守宮槐，風驚護門草。之子擅文華，縱橫富辭藻。舒錦

慙光麗握珠謝竒寶媿予非工文何用披懷抱

奉和皇太子懺悔應詔

有序

奉和皇太子懺悔詩仍上皇宸極聖旨即疏降同
所用十韻私心慶躍得未曾有招採餘韻更題鄙
拙

一聖智比明帝德光四海荷負誠悠屬度脫實斯在懺
說濟蒙愚推心屏欺殆名僧引定慧朝纓列元凱還迷
依善導反心由真宰和鈴混吹音勝幡榮雪彩早蒲欲

抽葉新篁向舒筵翹勤諒懇到歸誠信兼倍睿艷似烟
霞欄杆若珠琲善誘雖欲繼含毫愧文彩

和皇太子懺悔

習惡歸禮懺有過稱能改聖德及羣生唱說信兼採翹
心蕩十惡邈誠銷五罪三縛解智門六塵清法海超然
故無著逍遙新有待

和吳主簿六首

春日二首

日照鴛鴦殿萍生鴈鴛池游塵隨影入弱柳帶風垂青

骹

一作鵲

逐黃口獨鶴慘羈雌同衾遠遊說結愛久相離

於今方溘死寧須萱草枝

菴苑心未發薜蘿葉欲齊春蠶方曳緒新燕正銜泥野
雉呼雌雌庭禽挾子棲從君客梁後方晝掩春閨山川
隔道里芳草徒萋萋

秋夜二首

九重依夜館四壁慘無暉招搖顧西落烏鵲向東飛流

螢漸收火絡緯欲催機爾時思錦字持製行人衣所望
丹心達嘉客倘能歸

露華初泥泥桂枝行棟棟煞氣下重軒輕陰滿四屋別
寵增修夜遠征悲獨宿愁牽翠羽着淚滿橫波目長門
絕往來含情空杼軸

遊望二首

落日照紅妝挾瑟當窓牖寧復歌靡蕪唯聞歎楊柳結
好在同心離別由衆口徒設露葵羹誰酌蘭英酒會日

杳無期薜華安得久

相思不安席聊至狹斜東
愁眉傲戚里高髻學城中
雙眉偏照日獨蕊好縈風
自知心所愛獻賦甘泉宮
傳聞方鼎食詎憶春閨容

代牽牛答織女

新知與生別繇來儻相值如何

一作
豈如

寸心中一宵懷兩

事歡娛未繾綣倏忽成離異
終日遙相望祇益生愁思
猶想今春悲尚有故年淚
忽遇長河轉獨喜涼飈至
奔

精翊鳳軫織阿警龍轡

苦暑

日坂

一作域

散朱霞天隅斂青靄飛颺

一作光

煥南陸炎津

通北瀨繁星聚若珠密雲屯似蓋月至每開襟風過時
解帶

五日望採拾

裁縫逗早夏點畫守初晨綃紉既妍媚脂粉亦香新長
絲表良節命一作金縷應嘉辰結蘆同楚客採艾異詩人

折花競鮮彩，拭露染芳津。
含嬌起斜盼，斂笑動微頰。
獻璫依洛浦，懷佩似江濱。
須待恩光接，中夜奉衣巾。

奉酬從兄臨川桐樹

伊昔擅羽儀，待價龍門垂。
優游清露點，一作微穆惠風

吹月上陰陽，榦雲覆死生。
枝公子存高尚，聊用影華池。
棲鸞既不重，舞鶴復何施。
方同散木爨，清響竟誰知。

摘安石榴贈劉孝威

中庭有奇樹，當戶發華滋。
素莖表朱實，綠葉廁紅蕤。
既

標太冲賦復見安仁詩宗生仁壽殿族代

疑作茂

河陽溜

有美清淮北如玉又如龜退書寫蟲篆進對

一作封

多好

辭我家新置側可求不難識相望阻盈盈相思滿胸臆
高枝爲君採請寄西飛翼

東南射山

阮籍詠懷詩曰東南有射山

汾水出其陽言神仙之事

還丹改容質握髓駐流年口含千里霧掌流五色烟瓊
漿汎金鼎瑤池溉玉田倏忽整龍駕相遇鳳臺前

春遊

藜蘭已飛蝶
楊柳半藏鴉
物色相煎蕩
微步出東家
既同翡翠翼
復如桃李花
欲以千金笑
迴君流水車

春日

金堤草非舊
玉池泉已新
風生似羊角
雲上若魚鱗
幽閨多怨思
停織坐嬌春
芳華既零落
方作向隅人

向曉閨情

北斗行欲沒
東方稍已晞
晨雞初下樓
玉臺作
振羽曉露尚

方霑衾裯作錦衾徒有設信誓作蘭約果相違詎作誰忍開

朝鏡羞恨掩空扉

望夕霽

帝王集作簡文者非

連山捲亂

一作族

雲長林息衆籟密樹含綠滋遥峯凝翠

靄石溜正淙潺

一作潺湲

山泉始澄汰物華方入賞跂予心

期會

和孔中丞雪裏梅花

水泉猶未動庭樹已先知翻光同雪舞落素混

一作汨

冰

池今春競時發猶是昔年枝惟有長顛顚對鏡不能窺
摘園菊贈謝僕射舉

霸茅挺三春神芝曜九明菊花偏可憇碧葉媚金英重
九惟嘉節抱一應元貞泛酌宜長久聊薦野人誠

答元金紫餉朱李

穠華春發彩結實下成蹊潘生詠金谷魏后沈寒溪逢
君重妖麗移翫入崇閨慙無瓊玖報徒用萃幽棲

詠輕利舟應臨汝侯教

君侯飾輕利，搖蕩邁飛雲。
凌波漾鷁彩，汎水渙皎文。
電流已光絕，鳥逝復超羣。
倏忽方千里，戀茲岐路分。

詠燈檠

百華曜九枝，鳴鶴映冰池。
朱光本內照，丹花復外垂。
流暉悅嘉客，翻影泣生離。
自銷良不晦，明白願君知。

詠蠟燭

執燭引佳期，流影度單帷。
腫臃別繡被，依稀見蛾眉。
茨明不足貴，焦燼豈爲疑。
所恐恩情改，照君尋履綦。

和蕭子範入元襄王第

昔入睢陽苑，連步披風雲。
今遊故臺處，回望闐無人。
皓壁留餘篆，蕙圃有餘芬。
行人皆隕涕，何獨孟嘗君。

閨情

月出宵將半，星流曉未央。
空閨易成響，虛室自生光。
嬌羞悅人夢，猶言君在傍。

東陽還經嚴陵瀨贈蕭大夫

子陵狗高尚，超然獨長往。
釣石宛如新，故態依可想。

遊望

晨登黃馬坡遙望白龍堆
風威盡捺折路險車輪推



漢魏六朝百三家集卷九十五



總校官庶吉士臣侍朝

校對官中書臣張頊

膳錄監生臣李青標